



brief a ne unzfridne

Text: Hans Jürg Zingg / Melodie: Hans Jürg Zingg
Begleitimprovisation: Edwin Peter

du chunsch dr vor
wie nes nummero
es winzigs redli
im getrieb
püetz hätttsch zwar gnue
u gschär u chummer o
es schysst di a
dr ganz betrieb
du geisch i d ferie
finnland algerie
dört läbsch zwar herrlech aber scho nach vierzä tag isch schluss u du muesch wider zügle
hei ga bügle
tag für tag di düreschla di umeprügle
grüesse lächle
schliime ekle
stur u zyt- u gfüeuolos geng em gäut nacheseckle

du tröimsch drvo
dass aus ganz biuig wär
es häppyläif
zum nuutarif
wo d liebi frei u d püetz freiwiuig wär
du seisch däm gärn
auternativ
du wettsch e grüne sy
bi schaf u chüene sy
du tröimsch dyni aupechrütergartenutopie u plötzlech fragsch di öbs no drin ligt
wo dr sinn ligt
öb dr zwäck vo longo mai nid doch im gwinn ligt
u überhaupt
wo nähmtisch ds vieh här
wo nähmtsch ds land u d fründe d stütz u d energie här

du wirsch verruckt
wettsch aues zämeschla
du mööggisch NEI

u aus blybt stumm
wettsch druus u dänn
deheimen aus la schta
doch das geit nid
du weisch werum
di letschti schteigerig
vo dyr verweigerig
wär doch dy säubschtmord u we d dä nid fertigbringsch de nimmts di glych mau wider yne
i d lawine
gly bisch wider numen es teili vor maschine
wettisch mängs
aber chasch nüt mache
ghörsch zum schpiesservouk wo d säuber tuesch uslache

so langsam merksch
es git no viu wi di
du suechsch kontakt
u fingsch problem
di meischte hei
uf d frag WO WOSCH DU HI?
kei antwort zwäg
dasch unbequem
statt wyter z sueche jitz
fasch lut a flueche jitz
du geisch uf d strass u loufisch mit bi dene wo für öppis grächts tüe demonschtriere
hiufsch diskutiere
luegsch zue wi andri schybe vrschlö u hüser verschmiere
lehrsch d polizeiwach
vo inne kenne
fingsch aber aues das nid glatt u geisch ga penne

todfruschtriert
gammlich am nächschte tag i dr stadt ume
u triffsch bim ne caffe a dr münschtergass
dy früechrig leischt
u fragsch mi
win ig de das numen ushauti i däm verchaucheten inschtitut
öb i nid o scho a nes usschtyge tänkt heig
a nes auternativläbe
oder so

dadruf dä satz
wo mi vor öppe zwöjne jahr
wi us em schlaf useggrisse het
u mi siderhär nümm so rächt loslaht
wosch ne lose?

SEID SAND IM GETRIEBE
SEID SAND IM GETRIEBE

alternativ sy isch guet
sand im getrieb sy nid schlächter
beides brucht usduur u muet
immunität gäge glächter

alternativi gheie dür ds sieb
vo üsne gseuschafsnormen i ds lääre
sand im getrieb hautet ds land im betrieb
dr gägnere lehrsch kenne das hiuft mängs erkläre

alternativ sy brucht vii
sand im getrieb sy chönnt jede
eis aber ghört zu däm schpiu
rede u mit sech la rede

SEID SAND IM GETRIEBE
SEID SAND IM GETRIEBE

du weisch ds getrieb
isch nid elei dr schtaat
nid nume d bude d schueu d armee
es git no mängen andren apparat
wo sand chönnt bruuche
me aus je
so di verschidene
klüb vo unzufridene
da chönnten äntlech einisch lüt ufsta mit grütz u sage loset mir wei handle
mir verhandle
statt wi goofe stedt u outo ga z verschandle
gäu s brucht muet
so öppis z säge
s redt sech geng sehr liecht drfür u schwär drgäge
aber äbe

SEID SAND IM GETRIEBE
SEID SAND IM GETRIEBE

du gäu i weis für di tönt das itz aus chly rätsuhaft
du wettst e bscheid vo mir wo klareri verhältnis schafft
drum los dr vo myr predig jitz dr schluss no a
vilicht chasch öppis
mit däm afa

auso:

es isch nid wäsentlech dass d shtur a jedi demo geisch
dass d ohreringli lismichäppli bart u mitli treisch
o nid dass d haschisch oder WG-mitglied bisch
sand im getrieb sy
chasch o süsch

es isch nid gmacht mit biogmües u VCS
es isch nid gmacht drmit dass d POCH wäusch oder SPS
s längt nid dass d bisch gäg ds militär gäg d AKW
sand im getrieb sy
brucht no me

was nützt es we du di gäg usse wi ne gammler gisch
e scharfe redner tröjen unterschriftesammler bisch
was nütze läserbriefe was dys schpändegäut
we dir da inne
öppis fäut

am abe weni d ohre schpitze richtig lützuflüe
de tönt's derhär mer zwüschem glüt vor chiuchen und vo chüe
wi d schtimm vo däm wo dert mau gläbt het aus schenie
für di wär är aus pfaff
e schpiesser gsy

SEID SAND IM GETRIEBE
SEID SAND IM GETRIEBE
HEIT SHTAND IN DER LIEBE
HEIT SHTAND IN DER LIEBE

du hesch's errate ja dr gotthäuf isch's dr bitzius
de gythüng und regierigspüffle shtets ein ärgernuss
sand im getrieb nid zletscht grad drum wüu är geng seit
dass es nid ohni
liebi geit

SEID SAND IM GETRIEBE
SEID SAND IM GETRIEBE
HEIT SHTAND IN DER LIEBE
HEIT SHTAND IN DER LIEBE

drum los i zuekumft uf das doppuhorn vo lützuflüe
bis im getrieb sand u gib dr mit der liebi müe
u setz no viune lüt dä sandfloh hinger ds ohr
de tönt scho gly mau
e ganze chor

SEID SAND IM GETRIEBE
SEID SAND IM GETRIEBE
HEIT SHTAND IN DER LIEBE
HEIT SHTAND IN DER LIEBE

tschou

mach's guet

hüb muet